

قهوة

تشرب قهوه ؟

أشرب شاي

قهوه زياده

لأ مش جاي

شغل إيديه

و فوق العاده

لأ بزياده .. يا ستي زياده

أنا عايز شاي

ساده ياقلبي

طب ساده إزاي

و انا طالب شاي

شيلي عيونك

عن مفتونك

خبي السحر الساكن فيهم

و ادي لقلبي طلبه ف حبي

خلي هواكي يا سمرا هواي

قهوه و شاي

أرغول مع ناي

و الموال على صوت متقال

يانا يا هوايا و انت معايا

نبنني صروح

و نكيد عزال

طول ما إيديك بتنادي إيديا

و طول ما عنيك بتقول ليلاي

بس منايا أشوف فنجانك

و اقرا خطوطه
و احضن بحر هواك و شطوطه
و اظمن على نور دنياي
لكن أعمل إيه في القهوه
و انت مزاجك طالب شاي
هاشرب و اقرا لنفسي و اقولك
و اوعد قلبك من دلواقتي
المرات الجايه هنبقى
نعمل قهوة
و نشرب شاي